

Broj: 03-33-151/2020
Sarajevo, 05.02.2020. godine

VIJEĆE MINISTARA BOSNE I HERCEGOVINE
gosp. Zoran Tegeltija, predsjedavajući

Trg BiH broj 1
SARAJEVO

PREDMET: Intenzivnije postupanje nadležnih državnih ministarstava i tijela državne uprave BiH u uslovima pojave novog koronavirusa (2019-nCoV) koji je SZO 30.01.2020. godine proglasila javnozdravstvenim vanrednim stanjem od međunarodnog značaja- traži se

Poštovani,

Vlada Federacije Bosne i Hercegovine je na 155. hitnoj sjednici, održanoj 31.01.2020. godine, na prijedlog federalnog ministra zdravstva, razmatrala i usvojila Informaciju o pojavi novog koronavirusa (2019-nCoV) koji je Svjetska zdravstvena organizacija 30.01.2020. godine proglasila javnozdravstvenim vanrednim stanjem od međunarodnog značaja. Tom prilikom je usvojen Zaključak V. broj: 164/2020 od 31.01.2020. godine, koji Vam dostavljamo u prilogu ovog akta.

Tačkom 3. Zaključka utvrđeno je da će se Vlada Federacije Bosne i Hercegovine obratiti Vijeću ministara Bosne i Hercegovine kojim će se zatražiti da nadležna državna ministarstva i tijela državne uprave u Bosni i Hercegovini budu intenzivnije uključena u koordiniranje aktivnosti i mjera na sprečavanju i suzbijanju novog koronavirusa (2019-nCoV) na teritoriji Bosne i Hercegovine, te razmotre i mjere predložene od strane Stručnog savjetodavnog tijela za zaštitu stanovništva od zaraznih bolesti, a čije je izvršenje u nadležnosti državnih institucija.

Naime, nadležno Federalno ministarstvo zdravstva, Zavod za javno zdravstvo Federacije Bosne i Hercegovine, Federalna uprava za inspekcijske poslove, te Stručno savjetodavno tijelo za zaštitu stanovništva od zaraznih bolesti, u saradnji sa nadležnim kantonalnim institucijama i zdravstvenim ustanovama, kao i Graničnom policijom Bosne i Hercegovine su promptno reagirali poduzimajući čitav niz mjera zaštite stanovništva, u cilju sprečavanja nastanka i širenja bolesti izazvane novim koronavirusom (2019-nCoV), a saglasno Zakonu o zaštiti stanovništva od zaraznih bolesti („Službene novine Federacije BiH“, broj: 29/05).

Slijedom člana 187. stav (3) Zakona o zdravstvenoj zaštiti („Službene novine Federacije BiH“, br. 46/10 i 75/13) federalni ministar zdravstva je, saglasno svojim zakonskim ovlaštenjima, imenovao Krizni štab Federalnog ministarstva zdravstva, a u toku su imenovanja kantonalnih kriznih štabova koji obavljaju poslove i zadatke na osnovu Zakona o zaštiti stanovništva od zaraznih bolesti, kao i Pravilnika o organizaciji i načinu rada Kriznog štaba Federalnog ministarstva zdravstva („Službene novine Federacije BiH“, broj: 10/12). Krizni štabovi se kontinuirano sastaju, te sa ekipama na terenu provode potrebne aktivnosti. Saglasno preporukama Svjetske zdravstvene organizacije mjere koje se provode na teritoriji Federacije Bosne i Hercegovine primarno su fokusirane na rano otkrivanje eventualnog uvezenog slučaja bolesti izazvane ovim virusom u cilju brze izolacije i provođenja daljih mjera radi sprečavanja širenja infekcije. Također, redovno se informira javnost o strogom pridržavanju uobičajenih mjera smanjenja rizika od respiratornih bolesti, te praćenje obavijesti Svjetske zdravstvene organizacije o stanju širenja virusa i preventivnim mjerama koje treba poduzimati. Osim toga, Krizni štab Federalnog ministarstva zdravstva izdaje naredbe ministarstvima zdravstva, zdravstvenim ustanovama i drugim tijelima federalne i kantonalne uprave o poduzimanju mjera zaštite stanovništva na sprečavanju i suzbijanju novog koronavirusa (2019-nCoV) na teritoriji Federacije Bosne i Hercegovine, a saglasno svojim nadležnostima utvrđenim u članu 6. stav (5) Pravilnika o organizaciji i načinu rada Kriznog štaba Federalnog ministarstva zdravstva. Provedene aktivnosti kriznih štabova, ministarstava zdravstva, zavoda za javno zdravstvo u Federaciji BiH, Federalne uprave za inspekcijske poslove i dr. rezultirale su tome da do sada nismo imali zabilježene slučajeve sumnjivih i oboljelih osoba od novog koronavirusa (2019-nCoV).

Imajući u vidu sve naprijed navedeno, a cijeneći da je oblast zdravstva saglasno Ustavu Bosne i Hercegovine dodijeljena entitetima, smatramo važnim upozoriti na potrebu intenzivnijeg uključivanja nadležnih državnih ministarstava i tijela državne uprave u Bosni i Hercegovini u koordiniranje aktivnosti i mjera na sprečavanju i suzbijanju novog koronavirusa (2019-nCoV) na teritoriji Bosne i Hercegovine.

Naime, saglasno Zakonu o ministarstvima i drugim organima uprave Bosne i Hercegovine („Službeni glasnik BiH“, br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13, 19/16 i 83/17), prvensteno se traži intenzivnije uključivanje u navedene aktivnosti Ministarstva civilnih poslova, Ministarstva sigurnosti, kao i Ministarstva vanjskih poslova.

Naime, saglasno članu 15. Zakona o ministarstvima i drugim organima uprave Bosne i Hercegovine, Ministarstvo civilnih poslova je nadležno za obavljanje poslova i izvršavanje zadataka koji su u nadležnosti Bosne i Hercegovine i koji se odnose na utvrđivanje osnovnih principa koordiniranja aktivnosti, usklađivanja planova entitetskih tijela vlasti i definiranje strategije na međunarodnom planu i u oblasti zdravstva. Osim toga, pri ovom ministarstvu je uspostavljena i Konferencija u oblasti zdravstva u Bosni i Hercegovini, kao savjetodavno tijelo kojeg čine ministar civilnih poslova, entitetski ministri zdravstva i šef Odjela za zdravstvo Brčko Distrikta, a postupanje Ministarstva civilnih poslova i navedene Konferencije je od izuzetnog značaja kod koordiniranja svih aktivnosti iz oblasti zdravstva u datoj situaciji na cijelom teritoriju Bosne i Hercegovine.

U konkretnoj situaciji je izuzetno značajno i koordinirano postupanje Ministarstva sigurnosti na cijelom teritoriju Bosne i Hercegovine, a saglasno članu 14. Zakona o ministarstvima i drugim organima uprave Bosne i Hercegovine. Naime, djelokrug ovog ministarstva je prvenstveno zaštita međunarodnih granica, unutrašnjih graničnih prijelaza i reguliranje prometa na graničnim prijelazima Bosne i Hercegovine. S tim u vezi predlažemo da se u konkretnoj situaciji, kada smo primarno fokusirani na rano otkrivanje eventualnog

uvezenog slučaja bolesti izazvane ovim virusom, u cilju brze izolacije i provođenja daljih mjera radi sprečavanja širenja infekcije, odrede specijalizirani granični prijelazi na koje bi se usmjeravale osobe koje dolaze iz epidemioloških žarišta ove bolesti. Napominjemo da su federalni granični sanitarni inspektori locirani na graničnim prelazima Sarajevo (aerodrom), a u odnosu na kopnene granične prelaze isti su locirani na Bijači, Izačiću i Rači. Stoga smatramo da je od izuzetne važnosti odrediti specijalizirane granične prijelaze na cijeloj teritoriji Bosne i Hercegovine, a na koje bi se usmjeravale osobe koje dolaze iz epidemioloških žarišta ove bolesti. U sklopu Ministarstva sigurnosti je i Granična policija Bosne i Hercegovine koja je izuzetno važna za koordiniranje svih aktivnosti iz svoje nadležnosti na cijeloj teritoriji Bosne i Hercegovine. Napominjemo da su predstavnici Granične policije Bosne i Hercegovine aktivno učestvovali i bili vrlo kooperativni na sastanku koje je organiziralo Federalno ministarstvo zdravstva, kao i u kasnijoj komunikaciji sa Federalnim ministarstvom zdravstva, a koje se odnosilo na poduzimanje mjera i aktivnosti za teritoriju Federacije Bosne i Hercegovine. Također, pri Ministarstvu sigurnosti djeluje i Služba za poslove sa strancima. Od navedene službe je tražen podatak o broju kineskih i drugih stranih državljana koji su ušli u Bosnu i Hercegovinu, a dolaze iz epidemioloških žarišta ove bolesti, kao i o broju kineskih državljana koji imaju odobren privremeni ili stalni boravak u Bosni i Hercegovini. Navedeni podaci još nisu dostavljeni.

U konkretnoj situaciji vrlo je bitno i koordiniranje aktivnosti na cijeloj teritoriji Bosne i Hercegovine od strane Ministarstva vanjskih poslova, a imajući u vidu djelokrug rada ovog ministarstva utvrđen članom 8. Zakona o ministarstvima i drugim organima uprave Bosne i Hercegovine.

Stručno savjetodavno tijelo za zaštitu stanovništva od zaraznih bolesti Federalnog ministarstva zdravstva, formirano saglasno članu 64. Zakona o zaštiti stanovništva od zaraznih bolesti kojeg čine istaknuti stručnjaci iz ove oblasti, na sastanku održanom 29.01.2020. godine dalo je sljedeće zaključke/preporuke, a čije je izvršenje u nadležnosti državnih institucija, i to kako slijedi:

1. Ukoliko SZO proglasi vanredno stanje na globalnom nivou, a uzimajući u obzir trenutno neadekvatno opremljen i organiziran sistem protuepidemijskih mjera u Federaciji Bosne i Hercegovine tj. u trenutnoj epidemiji 2019-nCoV infekcije, Stručno savjetodavno tijelo za zaštitu stanovništva od zaraznih bolesti Federalnog ministarstva zdravstva, smatra kao moguće privremeno rješenje zatvaranja granica prema osobama koji dolaze iz ugroženog područje, te onima koji su bili u bliskom kontaktu s bolesnicima, uz naznaku prikrivanja informacija u epidemiološkoj anketi da podliježu Zakonu o krivičnom djelu (ugrožavanje zdravlja stanovnika). **Napomena:** Generalni direktor Svjetske zdravstvene organizacije je 30.01.2020. godine ponovo sazvao sastanak Odbora za vanredne situacije kako bi sa Odborom utvrdio da li epidemija novog koronavirusa predstavlja vanredni javnozdravstveni događaj od međunarodnog značaja. Generalni direktor je prihvatio savjet Odbora i proglasio ovu epidemiju vanrednim javnozdravstvenim događajem od međunarodnog značaja, te su date preporuke prema Kini, kao i zemljama svijeta.
2. Predlaže se mogućnost uvođenje viznog režima kako bi se kontrolirao ulazak u zemlju.
3. Državljanima Bosne i Hercegovine koji putuju u Kinu preporuka je da tamo ne idu.

Imajući u vidu sve naprijed navedeno, tražimo da, saglasno svojim nadležnostima, a u saradnji sa nadležnim državnim ministarstvima i tijelima državne uprave u Bosni i Hercegovini, osigurate intenzivnije uključene nadležnih državnih ministarstava i tijela državne uprave Bosne i Hercegovine u koordiniranje aktivnosti i mjera na sprečavanju i suzbijanju novog koronavirusa (2019-nCoV) na teritoriji Bosne i Hercegovine, te da se posebno razmotre i mjere predložene od strane Stručnog savjetodavnog tijela za zaštitu stanovništva od zaraznih bolesti, a čije je izvršenje u nadležnosti državnih institucija.

S poštovanjem,

The seal is circular with the text "HERCEGOVINA - FBDEKACHIA" at the top, "V L A D A" in the center, and "BOSNA I HERCEGOVINE" at the bottom. The city name "Sarajevo" is also visible at the bottom.
PREMIJER

Fadil Novalić

Prilog: kao u tekstu